

08/12/1997

Sasaran pelancong perlu dikaji

ruddin

PORT DICKSON, Ahad - Sasaran awal jumlah pelancong ke negara ini tahun depan, seramai 10.7 juta orang perlu dikaji semula berdasarkan kekuatan dan kelemahan industri pelancongan negara.

Pemangku Pengarah (Bahagian Penggalakan Domestik) Lembaga Penggalakan Pelancongan Malaysia, Ramlan Abd Rahman, berkata berasaskan jangkaan peningkatan 10 peratus setahun mulai 1996, sasaran sebenar bilangan pelancong tahun depan lebih rendah.

Katanya, bilangan pelancong dijangka hanya 8.71 juta orang, tetapi jumlah sasaran hasil RM13.7 bilion dijangka dapat dicapai berdasarkan purata jangka masa tinggal 5.6 malam dan perbelanjaan perkapita RM1,572.

Pada tahun 2000, katanya bilangan pelancong dijangka seramai 12.5 juta orang dengan sasaran hasil RM15.7 bilion.

Mengulas kekuatan industri pelancongan negara, katanya nilai ringgit yang semakin mengecil menjadikan negara antara destinasi yang murah dilawati pelancong asing.

"Kejatuhan nilai ringgit turut menjadikan pelancongan domestik menjadi semakin menarik," katanya membentangkan kertas kerja 'Prospek Industri Pelancongan di Malaysia' pada Seminar Pelancongan di Negeri Sembilan di sini, semalam.

Selain itu, katanya kemudahan infrastruktur semakin baik dan bertaraf dunia seperti Lapangan Terbang Antarbangsa Kuala Lumpur (KLIA), rangkaian lebuh raya, hotel dan pusat persidangan.

Ramlan berkata, negara semakin terkenal hasil publisiti meluas mengenai sesuatu pertandingan seperti Sukan Komanwel, siri pertandingan golf dan perlumbaan motosikal.

Malah, katanya semua pemimpin negara, termasuk Perdana Menteri, Datuk Seri Dr Mahathir Mohamad, memberi tumpuan khas kepada industri pelancongan.

Katanya, sektor swasta turut membantu memajukan industri pelancongan, selain kepelbagaian produk seperti alam semula jadi dan budaya yang boleh ditawarkan.

Bagaimanapun, katanya industri pelancongan mempunyai kelemahan yang perlu diberi perhatian serius.

"Antara kelemahan itu ialah masalah jerebu baru-baru ini memberi kesan buruk kepada industri pelancongan dan diburukkan lagi dengan laporan media massa asing yang tidak tepat," katanya.

(END)